

Declaramientu 8M 2018

JUNTAS SEMUS MÁŠ. Ca 8 de Marçu celebramus la aliança entre mugeris pa afial los nuestrus derechos conquistaus. Hue la juntança de muchas mugeris en el mundu, la que concedió grandis vitorias pa toas nusotras i mos truxu derechos que tenemus ogañu. Mos antecedi **una larga genialogía de mugeris** activistas, sufragistas i sendicalistas. Las que truxun la Segunda República, las que luchearun ena Guerra Cevil, las que combatieron al colonialismu i las que hizun parti delos luchis contraimperialistas. Assín i tó, sabemos que tovía no es bastanti: **quea abundu a hazel i nusotras siguimus a lucheal.**

La sororidá es la nuestra arma; es la ación grimeril la que mos premiti el siguil ahilandu. **La fecha del 8 de marçu es nuestra, entrenacional i reivindicativa.** Oi, 8 de Marçu, las mugeris de tol mundu semus convocás ala **HUELGA FEMINISTA.**

La nuestra dentiá es múltipli, **semus divessas.** Vivimus al ambiendi roal i al ambiendi urbanu, trebajamus eno laboral i enos cudiaus. Semus payas, gitanas, migrás i razialiçás. Las nuestras edais sonin toas i mos sabemos lesbianas, trans, bisessualis, entre, *queer*, eteru... Semus las que no están: semus las assessinás, semus las presas. **Semus TOAS.** Juntas oi aparamus el mundu i gañimus: *YA ESTÁ BUENU!* a tolas violencias que mos traviessan.

YA ESTÁ BUENU! de agressionis, abaxamientus, aventamientus o repuntás. Dessigimus que el Tratu d'Estau contra las violencias machistas –alo demás raneru– tenga recussus i meyus pal desenroamientu de políticas ralidosas i efetivas que ayuin a concedel una sociadá libri de violencias contra las mugeris i mochachas. Denunciamus la repressión a quien encabeçan el luchu polos derechos socialis i reproductivus.

YA ESTÁ BUENU! De violencias machistas, corrientis i invisibiliçás, que vivimus las mugeris qualisquiera sea la nuestra edá i condición. QUEREMUS de poel movel-mus en libertá en tolos espacius i a tolas oras. Asseñalamus i adenunciamus la violencia sessual comu espressión paradimática del apropiamientu patriarcal del nuestro cuerpu, que afeta de mó tovía más senificau a mugeris en paragi de volnerabilidá comu las mugeris migrás i las trabajaoras de casa. Es urgenti que la nuestra reivindicación *Ni una menus* sea una ralidá.

YA ESTÁ BUENU! D'apressión polas nuestras orentacionis i dentiais sessualis! Denunciamus la LGTBIfobia social, estitucional i laboral que sufrimus muchas de nusotras, comu otra horma de violencia machista. Semus mugeris i semus divessas. **MUGERIS LIBRIS EN TERRITORIUS LIBRIS!**

Semus las que reproducin la vía. Los oficius i cudiaus que hazemus las mugeris sonin emprecindiblis pal sustenimientu dela vía. Que possimenti sean de baldi o estén desvaloreau es una trampa nel desenroamientu del capitalismo. Oi, cona **huelga de cudiaus** ena familia i la sociedad, damos aparencia a un trebaju que naidi quieri reconocel, ya sea ena casa, mal pagu o comu economía çamargullía. Revindicamus que el trebaju de cudiaus tenga reconocencia de bien social de primel ordin, i dessigimus la redistribución d'esta crassi de tareas.

Oi reivindicamus una sociedad libri d'apressionis, d'esplotiju i de violencias machistas. Llamamus ala rebeldía i al luchu contra la aliança entre el patriarcau i el capitalismo que mos quieri docis, sumisas i callás.

No acetamus el estal acachinás a condicionis lavoralis peoris, ni cobral menus que los ombris pol mesmu trebaju. Por essu, oi tamién hazemus **huelga laboral**.

Huelga contra los techaus de cristal i la precaridá laboral, porque los trebajus alos que concedemus están asseñalaus dela temporalidá, la incerteniá, los salarius baxus i las jornás parcalis no querías. Nusotras embastecemos las listas del paru. Muchus de los trebajus que hazemus no tienin seguranças o no están reglaus. I quandu angunas de nusotras tenemos trebajus mejoris, mos topamus con que los puestus de salariu i responsabiliá mayoris están acupaus d'ombris. La impresa privá, la púbrica, las estitucionis i la política son reproductoras dela brecha de género.

YA ESTÁ BUENU! de descriminación salarial pol hechu de sel mugeris, de desvaloreu i d'acorrícamientu sessual en el ambienti laboral.

Denunciamus que **sel mugel sea la prencipal causa de probitú** i que se mos castigui pola nuestra divessidá. La precaridá s'agrava pa muchas de nusotras por tenel más edá, sel migrá i estal razialiçás, por tenel divessidá huncional o una imagi largu dela norma. Revindicamus que la nuestra sitación laboral mos premita el desenroal un proyetu vital con dinidá i autonomía; i que l'empreu s'adati alas nesseciais dela vía: el abraçu o los cudiaus no puein sel causa de repuntá ni d'empuntá laboral, ni devin embarrumbal las nuestras espetativas personalis ni professionalis.

Dessigimus tamién **las pensionis que mos amus ganau**. No más pensionis de holliza, que mos obligan a sufril probitú ena viejés. Piímus la cotitularidá delas pensionis i que el tiempu endedicau a tareas de cudiau, o que aigamus desenroau al campu, tenga reconocencia nel cálculo delas pensionis lo mesmu que el trebaju laboral i luceamus pol aponderamientu del Conveniu 189 dela OIT que regla el trebaju de casa.

Gañimus bien huerti contra el neoliberalismu selvagi que s'emponi comu pensaeru únicu nel andal mundial i que çalea el nuestro planeta i las nuestras vías. Las mugeris tenemos un papel sencial en el luchu contra la demuación climática i ena conduración dela biodiversidá. Por essu, apostamus de contau pola soberanía alimentaria delos puebrus. Sostribamus el trebaju de muchas collaças que arrigan la su vía pa afial el territoriu i los sus cultivus. Dessigimus que **l'afiamientu dela vía se assitúi nel centru dela economía i dela política.**

Dessigimus el sel protagonistas delas nuestras vías, dela nuestra salú i delos nuestrus cuerpus, sin crassi denguna d'apretación estética. Los nuestrus cuerpus no sonin mercancías ni ojetus, i, por essu, tamién hazemus **huelga de consumu.** Ya está buenu de sel gastás comu recramu!

Dessigimus tamién el **despatologizamientu** delas nuestras vías, las nuestras emocionis, las nuestras cercunstancias: l'amedicamientu respondi a enteressis de grandis impresas, no ala nuestra salú. Ya está buenu de consideral los nuestrus processus de vía comu malotías!

La educancia es la etapa prencipal ena que entangamus las nuestras dentiais sessualis i de género i, por ellu, las estudiantis, las maestras, la comunidá educativa i tol movimientu feminista dessigimus el nuestro derechu a **una educancia pública, laica i feminista.** Libri de valoris eterupatriarcalis dendi los primerus andaris educativos, enos que la huerça semus profissoras, i ata la nuversidá. Revindicamus tamién el nuestro derechu a una maestrança afetivu-sessual que mos aprenda ena divessidá, sin mieus, sin comprexus, sin amenuil-mus liquiamenti a cacharrus i que no premita agressión machista ni LGTBIfóbica denguna enas aulas.

Dessigimus un adelantu ena coeducancia en tolos terrenus i los ambientis dela maestrança i una educancia que no repuntei la nuestra Estoria delos librus de escuela; i ena que la vista de género sea travessera a tolas diciplinas. No semus una esceción, semus una costanti que á síu acallá!

AHILIN LA HUELGA DE CUDIAUS, DE CONSUMU, LAVORAL I EDUCATIVA!

AHILA LA HUELGA FEMINISTA!

Mugel denguna es ilegítima. Dizimus **YA ESTÁ BUENU!** al racismu i al descruimientu. Gañimus bien polo altu: No alas guerras i ala criación de materialis bélicus! Las guerras sonin produktu i destensión del patriarcau i del capitalismo pal barajeu delos territorius i delas personas. La resulta derecha delas guerras sonin milentas de mugeris arrecutías en tol mundu, mugeris que estamos a sel vitimiçás,

aborrás i violentás. Dessigimus el acogimientu de tolas personas migrás, qualisquiera sea la razón. **Semus mugeris libris en territorius libris!**

Denunciamus las recortaúras prossupuestarias enos setoris que más afetan alas mugeris: el sistema de salú, los servicius socialis i la educancia.

Denunciamus la corrupción comu parti agravanti dela crisi.

Denunciamus la justicia patriarcal que no mos considera sujetas de derechu prenu.

Denunciamus la repressión gravi i las recortaúras de derechus que estamos a sufril.

Dessigimus igualdá prena de derechus i condicionis de vía, i l'acebimientu total dela nuestra divessidá.

MOS QUEREMUS LIBRIS, MOS QUEREMUS VIVAS, FEMINISTAS, PELEAORAS I REBELDIS!

Oi, la huelga feminista no s'acabija:

ACONTINAREMUS ATA CONCEDEL EL MUNDU QUE QUEREMUS!